

## DE BUURVROUW - TON CUSTERS

Nag dök dink hae weer truuk aan wie 't vreuger 'ns begón  
 de buurvrouw die mós eins per waek 'ns effe aan de zón  
 Hae zag natuurlijk jao wie men 'm vroeg óm det te doen  
 want anger miense helpe det vonj hae altied al heel sjoon  
 zo ging hae eins per waek toen mit de buurvrouw aan de lóch  
 mer langzaam bleek det uurke mit de buurvrouw neet genóg  
 de buurvrouw brook 'n bein waem leut zo emes den allein  
 en net veur sjloetingstied ging hae nag sjnel nao Albert Heyn.

Det bein det kwoom neet good meer en de sókker ging ómhoog  
 hae ging mit häör toen same nao de endocrinoloog  
 Dae goof häör 'n recep toen veur 'n sjpuitje veur maol daags  
 mer wie hae sjpuite zitte mós det woor veur hem get vaags  
 Hae ging nao eine cursus en hae leerde wie 't mós  
 de buurvrouw die woor blie ómdet zie zelf det ech neet kós  
 Dus veur keer toen per daag zóch hae zien buurvrouw toen mer op  
 hae goof häör den 'n sjpuitje en vertèlde sjnel 'n mop

'T woor op 'ne goonsdig en hae leep toen euver sjtraot  
 hae kwoom toen mit de buurman van de buurvrouw aan de praot  
 Hae zag waat hae de ganse daag zo veur de buurvrouw dee  
 Det brach dae goje man in eine keer op 'n idee  
 want hae haaj ouch 'n buurvrouw en die woor neet good ter bein  
 en 's aoves door de waek den woor die buurvrouw dök allein  
 Vanaaf dae daag haet hae dus weer 'n nuuj adres d'r bie  
 en haet hae nooit meer ech 'ns veur zichzelf 'n uurke vrie